

永順縣志

地 27p.257  
38  
:T

共計八冊





永順縣志卷七

古丈坪廳輯畧

案古丈坪廳在永順縣東南界逼近紅苗與乾州鎮  
箠毗連峽險山崇足資保障自道光三年改設其賦  
役學校仍隸縣而文職統於府治武職轄於提標既  
與縣治攸分若綜列縣志之中殊於體例未協且地  
輿城市公廨亦應另繪一圖軍興以來由行伍起家  
擢至專閫大員者亦不盡歸縣籍爰就採訪所及彙  
輯成編雖軼事尚多未臻美備而詳載府縣志者皆  
可按籍而稽他年文物聲明日新月異將見人才蔚  
起繼是編而增美無窮矣

永順縣志卷之七

古丈坪輯畧

一









廳喜 鵲營 接界 廳九 城十 里



永順縣志 卷之一

輿圖

東南與沅陵縣烟草坪接界 距廳城一百二十里

東與沅陵縣草塘 鋪接界距廳城八十里

沅陵縣界



疆域

東與沅陵縣接界距廳城八十里

又東與瀘溪縣爛草坪接界距廳城一百二十里

南與乾州廳喜鵲營汎接界距廳城九十里

西與保靖縣白棲關接界距廳城五十里

北與永順縣王村汎接界距廳城四十五里

東北俱是民村西南俱是苗寨崇山不通大道小溪

不通舟楫東南西俱陸路極險惟北路沿溪行稍平

三十里至羅衣溪通北河水路



山水

青雲山城北里許聳拔入雲四時青光不斷上建觀音菴

文筆山城南三里許峯勢高聳遙望如文筆插天外

轎頂山城南十五里在西英保高涼岡形如轎頂

玉屏山城東里許出龍肝石可鑿爲硯

通明山城北二十里羅衣保山勢陡險下臨深潭上建祖師觀音殿

了角山城南二十里苗地兩峯並峙高聳入雲土人相傳山頂昔建有古廟年久朽壞僅存甃瓦遺跡

永順縣志

卷之七

山水

五

猛虎嶺城南三里許山勢凶猛如虎蹲形

南山坳城西里許通保靖縣大道

天橋山城南二十五里上建祖師觀音佛殿神最靈雷電時呵護之

香爐山城東沿溪行五里許平地突起一峯高可數丈其頂上石形如香爐

古丈坪河城南六十里源出保靖縣境之狗腦山北流三十里經宋家巖出長潭至本城南門外繞城北曲折下流三十里抵羅衣溪入大江沿河亂石激湍水勢洶湧奇險異常秋冬水涸寒裳可渡春夏水漲似可通舟然人畏其險無有問津者



河蓬河城南四十里源出功全保白羊山經旦武汛南流九十里至瀘溪境水勢漸暢可通舟內納小溪水難以備載又東南流五六十里入沅陵境與洞坪河合流二十里出烏速口歸大江爲酉溪按此卽今永順縣志與沅陵縣志所載酉水出沖正保白羊山經葛籐寨而入沅陵之酉溪也

洞坪河城東六十里其源有二一出廳屬功全保之蒿坪分水嶺經豺狗寨南流出土溪一出高望山經嚴溪西流至洞坪上流里許兩水合流三十里入沅陵境又與河蓬河合流出烏速口入大江亦名酉溪沿途亂石激流礙難疏濬不通舟楫

永順縣志

卷之七

山水

六

平壩河城南五十里源出保靖縣之三岔河經萬巖溪南流至土壘坡汛流五里至平壩可通舟又流五六十里抵乾州潭溪入洞河達瀘溪境計程一百一十五里

蔡家河城西三里許源出保靖縣米希溝下流二十餘里經紅沙溪上流五里許迂曲而出至新寨汛入古陽河計程三十里

水田溪源出城東南二十五里梓木坪與酉源自白羊山南北分流至本城南門外入古陽河

羅依溪城北三十里源出高望山下流經毛坪而入古陽河歸大江



甘泉二一在城南門外半里許泉出碑巖山石罅中  
四時不涸一在城北門外一箭之遙泉自山腳流  
出秋冬不竭味甚甘暑渴飲之熱卽解



勝蹟

天橋山城南二十五里山腰兩峰對峙橫石如梁下  
臨百餘尺洞深難測俯視涼風襲人面建佛殿其  
上四壁懸白崖山以名也始無路可通土人於橋  
旁小阜鑿石爲磴架木二丈許爲橋梯階入望爲  
進香亭其石有倒懸如靴直豎如筆如劍如席帽  
者其洞有水曰龍曰雷曰鳳凰窩者山無名而人  
爲之名也每六月朔各砦村男女結伴爲進香會  
西英保之勝概也節錄生員危紹南詩序而佚其詩

穿洞城南四十里功全保山勢壁立中空一洞溪水

自洞中橫流而出片石鱗鱗纍纍如砌甃然

永順縣志卷之七

勝蹟

八

貓兒菴又名通明山在城北二十里羅依保山勢聳  
拔古樹叢繞成圍遙望狀如貓兒下臨深潭碧綠  
澄清古陽河凡九渡惟此最深行人恆畏之

古陽八景

龍潭印月 城西北隅相傳爲龍潭口水色秀綠深  
不可測夜月照其中如珠滾盤然

虎嶺嘘雲 城南五里其嶺最高如虎負隅常有雲  
霧氣盤聚其上

西場賽社 城西門外有坪可容二千餘人卽古丈  
坪營之演武廳每遇五月二十八日迎神會期各  
村男女聚會場中互相歌和此俗至今猶存



南浦觀濤 城南門外兩水夾流春水漲時波濤澎湃  
流如拜揖之狀

桐花飄雪 城東五里有桐百餘株花開落時隨風  
飄舞如飛花滾雪之狀

楊柳垂陰 城北門外沿河垂柳千株濃陰一碧其  
下可浣衣乘涼

谿桃紅雨 城南五里紅沙溪遍種桃樹二月花開  
光豔奪日落如紅雨

叢桂香風 城南文昌宮有丹黃桂二種當秋花時  
十里皆香

羅江八景 貢生唐明信舊有詩今佚

永順縣志 卷之七

勝蹟

九

羅江夜雨

野徑樵歸

石盂甘泉

龍潭漁網

雙溪印月

高望積雪

茅店雞聲

蕭寺煙鐘



城 卽石堡

城週圍一里零三分計長二百三十四丈設三門南曰迎薰西曰瑞金北曰召平東有礮樓一座嘉慶十四年建

公署

同知署雍正十年建照牆頭門二間東西書阜房六間大堂三間廂房四間過廳二堂三間書房三間住房三間廚房三間下房三間過牆八十五丈道光三十年燬於火署撫民府秦廷杰重修

巡檢署在同知署東道光三十年燬於火咸豐八年巡檢何佩捐廉重修頭門阜房二間大堂三間二堂三間廚房二間住房四間

永順縣志

卷之七

城 公署

十

都司署在同知署後

存城千總官房在同知署西南

附城屯額外官房在西城外

火藥局在東城外

監獄一間原在同知署西今朽爛未修有命犯移寄縣監

軍裝庫額儲收繳苗人烏鎗刀矛年久朽壞皆成廢鐵



塘防

半坡塘

蔡家莊塘

河蓬塘

賣茗塘

山棗溪塘

鋪司

原設鋪司二名前經奉文裁撤遇有公文均係專差

逕送辰陽驛轉遞

廟祠

附寺觀

城隍廟

在城內

文昌閣

在南門外

關帝廟

在北門外

昭忠祠

在北門外

永順縣志

卷之七

塘防

鋪司

十一

龍神廟

在北門外

萬壽宮

一在城內一在羅依溪江西客民建

伏波宮

一在城內一在土蠻坡

天橋山寺

在西英保

二龍菴

在沖正保

通明山寺

在羅依保

迴龍菴

在羅依保

青倚閣

在青魚塘



橋梁

三道河橋自古陽三十里凡九渡至羅依溪山溪之水淺處可涉深則狂瀾激石勢汹涌狎之有滅頂災春漲添則唱公無渡鋪遞文書悉爲之閣譚震撫古陽不便之首倡修橋議未成工左遷去王村饒啟盛續成之道光末年水高於橋橋隨水圯同治七年城紳楊占鼂重修十一年春水方滋又爲放木者推倒石基橋又圯於水明年撫民府克從檄木戶修之橋成下礮五門如之建涼亭其上當暑可駐足行人便之是年十月撫民府復檄修旁通小徑可肩輿自樹喜科分路盤山沿溪行過下

茅坡渡約二十里直達小官坪人亦便之

河蓬橋通沅瀘道

平壩橋通乾鎮道

羅依溪橋通永邑道



都里

羅依保

西英保

冲正保

功全保

民村二百二十八寨

苗村五十八寨

市場

西門外市

龍鼻嘴市

河蓬市

坪扒市

簞衣坡市



賦役

同知係專管羅衣西英冲正功全四保命盜詞訟軍  
流以上命犯由永順府勘轉學校錢糧仍歸永順  
縣管理

學額

前同知譚震稟請添設學額由府牒轉因格於例  
未行仍歸永順縣考試

戶口

土民戶六千二百二十八口男婦三萬零九百六十  
二  
苗民戶一千一百二十五口男婦五千二百五十七



義學

一在坎著寨

一在茅坪寨

每年延請明白之苗生苗童教讀以便語言易通  
每館每年穀十二石在屯防經費下支給



屯田

嘉慶十年均屯田畝安設屯碕十四座

押板巖碕

桐木沖碕

滾水坳碕

苟拉巖碕

烟筒巖碕

龍洞碕

几著宅碕

排開坪碕

白巖沖碕

永順縣志

卷之七

屯田

十六

後門碕

新寨碕

排仰坪碕

巖坳碕

西山碕



倉儲

常平倉

在同知署西

倉廩六間道光三十年八月民房失

火被燬前同知秦廷杰修復同治八年同知覺羅克從重修

計倉儲穀一千九百八石六斗七升除清查案內徐畢二任虧短外現實存穀一千一百四十三石零

屯倉

一在同知署側四間道光十年燬前道憲發項修

復除舊存穀外每年額存新租穀一百一十五石零

一在龍鼻紫二間除舊存穀外每年額存新租穀二

百二十四石零

一在曹家坪一間除舊存穀外每年額存新租穀一

百石零



俸廩

同知每年俸銀八十兩養廉銀八百兩新添津貼銀  
七百兩嗣因添設錦田汛兵丁奉交減兵米銀五十  
兩其餘津貼銀六百五十兩按季與廉銀赴 藩庫  
請領

每年額食屯防辦公穀二百石嗣奉

前道憲 奏減四成每年應食辦公穀一百二十石

按季赴屯倉支領

原設

民壯十五名

快役八名

皂役十二名

捕役十二名

門子二名

鋪司二名

轎傘夫七名

其鋪司二名奉文裁

永順縣志 卷之七

俸廩

十八

案道光四年改設撫民同知又

添設

捕役二名

快役八名

皂役四名

庫子一名

禁卒四名

件作一名

共八十二名除幫永順縣禁卒二名應食工食銀  
兩由該縣自行請領並解道署招轉科工食二名  
飯食銀兩十二兩外每名每年額設工食銀六兩

按季赴 藩庫請領

科房經書額設工食九名每年每名工食銀六兩即  
在各役工食內抽撥發給以作筆紙之費

額設斗級一名每年工食銀六兩終備文由龍山  
縣移永轉給



巡檢每年額設俸銀三十一兩養廉銀八十兩五錢

二分按季由廳給文赴藩庫請領轉給

每年應食籌捐屯防辦公穀一百石經奉

前道憲奏減四成應食辦公穀六十石按季由

廳詳道請發紅票轉給赴屯倉收領

額設弓兵十四名卓隸二名每名每年工食銀六兩

按季由廳具文赴藩庫請領轉發

同知轄設總屯長一名散屯長四名屯百總總小旗

屯兵共一百名均分授口糧田畝自行佃耕遇有事

故開除由廳考拔分別詳道

苗守備每年俸餉銀十六兩

永順縣志

卷之七

俸廩

十九

苗千總每名每年俸餉銀十二兩

苗把總每名每年俸餉銀八兩

苗外委每名每年俸餉銀六兩

俱按季由廳具文赴道請領傳齊各苗備弁到

案當堂包封按名發給各弁每年年終甄別一次

遇有事故開除把總外委由廳考拔詳道發給

條劄千總守備由廳遴選送道驗拔

額設苗兵一百名每名每年支口糧穀三石六斗遇有

故開除由苗守備挑選餘丁送廳考補

古丈坪營額設馬步守戰兵四百三十八名

本城馬兵八名戰守兵一百五十七名



附城新寨汛駐戰守兵三十名

旦武營 牀機坡汛共駐戰守兵七十四名

龍鼻嘴 巖坳汛共駐戰守兵六十名

土蠻坡 曹家坪汛共駐戰守兵五十四名

黑潭坪 排沙汛共駐戰守兵五十五名

口糧由營請領發給



職官

廳原隸永順府治歷設督捕同知道光三年改設撫  
民同知管理羅依西英冲正功全四保命盜詞訟都  
司一員管理弁兵

文職

同知

譚震雲南永北廳舉人道光四年由桃源縣升任  
時初改爲撫民府苗疆百度創始爲難公才學兼優  
講武興文風俗一變嗣以議開學校竟至去官人尤  
惜之

李之梓雲南河陽縣進士由代理郴州十二年升任

永順縣志

卷之七

職官志

二十一

嗣署岳州府明年三月復任有才識善折獄廉介不  
受一錢尤重讀書人捐修城隍廟並置祀田

馮茂勳江西都昌縣舉人十五年由署永順縣兼理  
費慶雲江蘇武進縣監生十五年十二月署理

嚴煥浙江仁和縣監生十六年八月升任

穆清阿正紅旗進士十六年十二月由永綏廳同知  
調補

鄭謙河南溫縣舉人十八年三月署理

穆清阿先署永順府於十八年十二月回任

謝雲華江西宜黃縣進士二十年七月由保靖縣兼理  
黃其表廣東南海縣進士二十一年六月由保靖縣



兼理

秦廷杰江蘇金匱縣從三品廕生二十二年六月由署永順縣兼理

畢元勳順天大興縣副榜二十三年二月由武岡州州同署理

黃宅中山西河曲縣進士二十四年由福建閩縣推升公號惺齋行義政事文章素著於時閩人皆戶祝之是年署寶慶府明年擢貴州大定府到任與否惜亡其籍見寶慶府志

秦廷杰於二十五年六月由永順縣兼理

張長庚河南長葛縣舉人二十五年八月由辰谿縣

永順縣志

卷之七

職官

二十一

署理性寬厚廉潔自奉儉約食無兼味而於文課獎賞獨優朔望率紳耆宣講 聖諭不倦移茶陵州

秦廷杰於二十六年八月初一日由永順縣兼理

夏廷樾江西新建縣監生二十六年由長沙縣調署八月二十五日到任旋因公音省仍以永順縣秦兼理九月初二日到任

沈 沿江蘇吳縣二十七年正月由署永順府兼理夏廷樾於二十八年六月回任

秦廷杰二十九年九月由永順縣署理

張 淮順天宛平縣舉人咸豐三年由保靖縣兼理和陞額鑲藍旗繙譯生員五年由分發撫民府同知



署理

曹源雲南昆明縣進士

覺羅克從宗室由御前鳴贊揀發湖南同知八年署理

保齡正黃旗監生十年由署乾州廳補授四月到任

湯健中江蘇監生十二年署理

覺羅克從同治八年由辦理永州釐局保舉知府銜補授

按古丈坪原設糧捕銜名無考自改撫民廳後文

案復燬於火傳有衛君山西人道光末年沒於任

今佚其名

巡檢

顧紹義江蘇元和縣監生道光四年六月由江華縣

永順縣志卷之七

職官

二十三

錦岡巡檢調署

唐超順天大興縣九年六月由永順縣典史升任

郭邦翰陝西商南縣十年五月由代理永綏廳經歷

署理

陳其宏順天大興縣監生十一年四月由激浦縣龍

潭巡檢調補

唐超十八年由丁憂起復回省坐補古丈坪巡檢

原缺六月到任

李步義廣東信宜縣貢生二十年由試用州判分發

永順府聽差代理八月到任

萬錦江西南昌縣監生二十五年由華容縣黃家穴



巡檢署理八月到任二十六年正月奉文實授

張毓絡順天昌平州人二十七年由卸代龍山縣署理  
二二月到任

趙先登陝西登城縣書吏二十七年由署麻陽縣縣丞  
調署十一月到任

嚴榮奎浙江歸安縣監生試用未入流咸豐二年四月  
署理

張國森江蘇江陰縣監生由王村巡檢兼理二月到任  
何佩甘肅西甯縣人由伊犁總統吏書選授邵陽縣  
隆回巡檢歷十二年加州同銜府經縣丞升用調補  
今職咸豐六年到任同治元年俸滿調驗二月以下

永順縣志

卷之七

職官

二十四

村司朱益庭兼理八月回任九年調驗四月以王村  
司王澧兼理六月回任十二年調驗四月以王村司  
王澧兼理閏六月回任

屯弁

額外一員 駐本城

把總一員 分駐龍鼻嘴

苗守備一員

苗弁十八名 千總二名 把總四名  
外委十二名

武職 歸提營管轄

都司一員

右哨存城千總一員



左哨千總一員 駐日武營

左司把總一員 駐龍鼻嘴汛

右司把總一員 駐土壘坡汛

前司把總一員 駐黑潭坪汛

附城外委一員 駐新寨汛

左司外委一員 駐牀機坡汛

右司外委一員 駐曹家坪汛

左司額外一員 駐巖坳汛

前司額外一員 駐排沙汛

存城額外一員 駐本城火藥局

按古丈坪營歷年署任各銜名緣文案不全未經

永順縣志卷之七

職官

二十五

造冊送局候查實後補載



仕進 世襲附

楊占鼇古丈坪人咸豐二年投効水師營於湖北安嶽  
江西江南各省屢著戰功歷保花翎提督銜記名總  
兵資勇巴圖魯護理甘肅軍務歷署督中協涼州鎮  
克復甘肅省城 賞穿黃馬褂現署甘州提督  
蕭長茂由行伍奉調出師粵西長沙湖北江西各省著  
績咸豐六年拔補辰州營左哨千總復調赴安嶽打  
仗出力保花翎儘先參將銜同治元年委署澧州營  
參將隨補該營實缺十一年入京引 見道卒  
任世素祖籍澧州由行伍出師金川著績旋因三廳苗  
變攻剿出力補古丈坪營左哨千總卒

永順縣志

卷之七

仕進

二十六

任大貴武生歷升貴州古州鎮標朗洞營參將咸豐二  
年在長沙省南門外蔡公坡殉難奉 部議賞給雲  
騎尉世襲罔替

任萬年由行伍拔補把總咸豐元年六月在廣西武甯  
縣東鄉村地方打仗陣亡奉 部議給予雲騎尉世  
襲完時賞給恩騎尉罔替

任祖文咸豐四年由行伍奉調出師長沙江西安嶽湖  
北江南各省屢著戰功保花翎儘先副將現任鎮守  
鎮標右營遊擊兼世襲雲騎尉

任祖武世襲雲騎尉現署辰州城守營金廠守備

蕭大喜由行伍拔補把總咸豐二年奉調出師長沙湖



北九江一帶著績升級甯營千總兼署長安營守備  
告老回籍卒

張隆貴由行伍咸豐十年辦古丈坪防務保舉外委補  
永綏協中營把總

楊泗源咸豐二年投効水師營在湖北江西各省辦理  
軍務著績保舉賞戴藍翎以從九儘先補用回籍卒  
伍德欽由行伍出師著績保花翎都司銜儘先守備補  
河溪營把總因格於例開缺赴貴州復字營投効在  
都勻府屬高界冗旺地方攻剿苗匪傷亡奉 部議  
給雲騎尉世襲

黃中興由武童投効貴州軍前疊次殺賊出力保儘先

永順縣志

卷之七

仕進

二十七

把總八年六月在都勻府屬之羊安地方陣亡奉  
部議給雲騎尉世襲完時給予恩騎尉世襲罔替長  
子遇恩承襲

王福山羅依保人由義勇咸豐五年從征江西安徽各  
省保舉遊擊銜儘先都司後於同治八年六月初八  
日在貴州都勻府屬之羊安地方勦賊傷亡 奉  
部議給雲騎尉世職襲次完時給予恩騎尉世  
襲罔替以長子清貴承襲

蕭長順咸豐四年由行伍隨克長茂出師長沙隨調赴  
永州在甯遠縣打仗陣亡



封贈

楊士俊以曾孫占鼇貴

贈振威將軍妻伍氏 封一品夫人

楊源富以孫占鼇貴

贈振威將軍妻陸氏 封一品夫人

楊本哲以子占鼇貴

贈振威將軍妻李氏 封一品夫人

楊占鼇元配謝氏先卒續娶黃氏咸豐十年占鼇

甘州提督

誥授振威將軍妻 封一品夫人

蕭維德以孫長茂貴

永順縣志 卷之七 封贈

贈武義都尉妻向氏 封淑人

蕭大喜以子長茂貴

贈武義都尉妻唐氏 封淑人

蕭長茂任澧州營參將

誥贈武義都尉妻張氏 封淑人

杜順之妻楊氏以子大定任貴州知縣次子健元任

本城千總疊膺

封贈

張開榜以孫隆貴任永綏協中營把總

贈武信騎尉妻曾氏 封孺人

張心義子隆貴任永綏協中營把總



誥封武信騎尉妻吳氏

封孺人

張明利山監生加捐州同銜並為其父母捐請六品

封典

永順縣志

卷之七

封贈

二十五



隱德

許光治母早寡有二子治最孝家貧投營得丁糧奉母  
母老病哽凡寒煖溫清怡顏皆先母意爲之母沒倚  
廬盡哀母有遺產悉以歸兄兄無嗣以長子繼之人  
皆稱其友弟云

杜順之初考縣佾生爲本廳吏例推爲職員練達時事  
譚震任古陽尤倚重之道光己酉歲凶民苗譁然順  
之倡捐賑請開常平倉官從之全活甚眾九男三女  
婿皆武職四男大定貴州知縣五健元任本城千總  
六七均以千把候補九光佑亦把總貌魁梧多力嘗  
背母避寇行萬山中咸豐十年健元俸滿奉咨引

永順縣志

卷之七

隱德

三十

見佑與偕行道漢江船上健元失足落水佑急躍身手援  
之隨流上下人救之皆免而佑歸竟以疾卒妻黃士  
位女亦相繼逝遺子女三健元兄弟撫育之

危正級樸古力田三世以仁壽稱子定禮繼父志不責  
負於人孫萬柱能讓與弟分產獨取瘠者爲屯長三  
十年能爲里中排難解紛云

危光璜儒而賈儉而好施友于而睦族有子四長紹南  
邑庠生次就武職餘仍守儒業

黃開第江西臨清縣武生幼隨父貿易寄籍古丈坪改  
捐從九品質直而好義見貧人病則施藥寒則施衣  
死不能殮則施葬具子二長投効貴州軍營陣亡



旌義士祠次原籍邑增生

壽民

呂良美九十六歲以壽終

向文貴九十七歲以壽終

余宗信現年九十四歲

向永泰九十一歲以壽終曾募修三道河橋

危萬全古丈坪人現年九十歲本廳屯長

節婦

楊氏源寶女年十九嫁伍立珍二十七珍亡貧守寡

撫子嵩福嵩達教養授室氏母道方盡而子相繼逝

氏復撫孫德欽德欽由行伍從征粵西保舉守備復

永順縣志

卷之七

壽民

節婦

三十一

赴貴州効力剿匪陣亡援例 議卹氏復撫曾孫純

燬承襲今年九十五歲元曾繞膝五代同堂

李氏世興女年十九嫁羅依保唐正鼎鼎病瘵氏奉

湯藥惟謹五年鼎沒姑蔣氏亦早寡老且瞽便溺皆

氏扶持今年五十猶與瞽姑共處斗室中人猶罕見

其面云

楊氏王村光沅女嫁古丈坪營弁張大倫年二十七

夫故無子孀姑在堂氏矢志守節家極貧力勤作事

姑能以孝聞

李氏楊本哲妻年二十于歸生三子一女不十年夫卒

家貧氏撫子女成婚嫁備極勞瘁三子皆從戎以次



子 西 鼈 貴 如 例 請 封

物 產

田 種 稻 穀

地 種 雜 糧

另 桐 油 子

茶

錦 雞

蜂 蜜



雜詩

雷別古陽

撫民府譚震

解組飄然去紛紛送舊官催科知政拙生計覺民難  
道直心無忤囊空睡亦安焚香增我愧澤未徧寒酸

其二

民苗安插處記是古沙場兵燹餘流徙民農少蓋藏  
風吹苗地草樹護女牆桑教化他時事猶畱兩講堂

其三

琴鶴引徐徐臣家有敝廬三邊休戀棧六秩合懸車  
下考書年老新官到歲除前津何處問陶令賦歸歟

其四

永順縣志

卷之七

雜詩

三十三

如此歸田去翻存大吏恩孤寒休雪涕獐狔漫攀轅  
宦海一朝別故園三徑存晚霞無限景恰當未黃昏

古陽穿洞畱題

並序

生員黃祥雲

城南四十里有山洞穿百尺前如門後如盂  
東流一溪橫出其中聲泠泠然生寒氣石壁  
題名數行僅識黔陽二字沿溪旁通小徑黝  
黑凡三曲約半里復見天宇山田林巒如畫  
望對岸兩石柱拔地而起高與山齊穿穴作  
井水清見底魚鱗鱗可數皆奇蹟也得五言

古一首

羣峰雜逕環罅隙泯苔綠何年孕老蛟風雷裂山腹



高建十丈旗廣容千間屋溪水橫貫來雪浪翻天軸  
名于沿岸行慘淡日光縮懸崖叫鶴鷗昏霧撲蝙蝠  
酸風逼人寒口噤肌生粟壁上誰雕容水蝕字難讀  
自笑身入甕幽徑經幾曲豁然天宇闊清氣豁雙日  
淺紅媚澗花遠碧上林木格磔山鳥鳴蠻歌相斷續  
我聞宇宙間洞天三十六彼則神仙棲此乃荆莽伏  
勝迹亦如人所遭有榮辱那知奇氣鍾原不限荒服  
剷蘚我畱題爲洗山林俗題罷夕陽斜蟬聲將予促  
拂衣長嘯歸白雲生空谷

南浦觀濤古陽八景之一

鍾震

雙溪夾水浪滔滔雨後奔騰吼怒濤一樣畫橋丁字

水其如河廣不容刀